

TEKS UCAPAN

**YBHG PROF. DATUK. DR MOHD HARUN BIN ABDULLAH
NAIB CANSELOR UMS**

**SEMPENA MAJLIS PERASMIAN
SUKAN STAF UMS KALI KE-16**

**TEMPAT : DEWAN TAEKWONDO UMS
TARIKH : 07 APRIL 2017 (JUMAAT)
MASA : 4.30 PETANG**

Terima Kasih Saudara Dan Saudari, Pengacara Majlis

Salutasi

En. No'man Datuk Hj. Ahmad
Pendaftar UMS

Ketua-ketua Kontinjen, Pengurus-Pengurus Pasukan, Para Pegawai, Jurulatih dan Atlet-atlet Sekalian.

Assalamualaikum WBT., Salam Sejahtera dan Salam Negaraku Malaysia kepada warga UMS yang hadir pada petang ini. Izinkan saya membacakan teks ucapan YBhg. Datuk Naib Canselor yang kini sedang melakukan tugasan rasmi di luar negara.

Bersyukur kita ke hadrat Allah SWT kerana dengan limpah dan izin-Nya, kita dapat berkumpul dan memeriahkan kejohanan Sukan Staf UMS kali ke-16, untuk tahun 2017 yang sudah pasti memberi kenangan bermakna kepada kita semua. Setinggi-tinggi penghargaan dan terima kasih kepada jawatankuasa pelaksana atas kejayaan mengelola dan menganjurkan kejohanan ini yang mana saya difahamkan pada tahun lalu telah ditangguhkan atas sebab kekangan bajet dan Alhamdulillah, pada tahun ini kita berjaya merealisasikannya.

Syabas dan tahniah kepada semua kontinjen yang menyertai kejohanan ini. Komitmen dan kesungguhan inilah yang kita harapkan bagi memastikan penglibatan kakitangan dalam acara sukan yang dijalankan setiap tahun mencapai objektif. Saya percaya, tanpa penglibatan semua pihak, sudah tentu kejohanan ini tidak akan meriah dan bermakna.

Warga UMS yang saya hormati sekalian,

Saya difahamkan, penganjuran Kejohanan Sukan Staf UMS ini selain sebagai riadah, ia juga bertujuan melahirkan kakitangan cergas dan positif yang sentiasa dapat meluangkan masa bersukan sama ada melalui senaman mahupun berjogging.

Ataupun sekurang-kurangnya memperuntukkan sedikit masa mengamalkan gaya hidup sihat sepanjang berada di universiti dan di mana jua kita berada.

Kita sedia maklum, kerajaan juga telah mengambil langkah bersepadu mentransformasikan Malaysia ke arah negara bersukan agar dapat membantu mengatasi masalah berkaitan kesihatan dan budaya malas bersukan dalam kalangan rakyat.

Kita juga sedia maklum, produktiviti seseorang individu bergantung kepada tahap kecergasan individu tersebut. Oleh itu, sudah tentu kerajaan khususnya universiti mengambil berat terhadap pembudayaan sukan agar mampu meningkatkan produktiviti serta dapat dipraktikkan semasa bertanding dalam setiap acara sukan.

Tuan tuan dan puan puan sekalian,

Saya menyarankan semua kakitangan yang mengambil bahagian pada kejohanan kali ini,kekalkan semangat kerjasama untuk meraih kejuaraan tanpa adanya perselisihan faham. Melalui kejohanan sukan ini, saya juga berharap kakitangan yang lama dan baharu dapat berkomunikasi dan bersaing secara sihat untuk mencapai kejayaan. Dengan ini, sudah pasti pengukuhan ikatan silaturahim dalam kalangan kakitangan akan terjalin.

Selain itu, pihak pengurusan universiti juga akan terus menyokong perancangan menambah baik prasarana sukan yang sedia ada bagi membantu dalam perkembangan sukan di universiti. Justeru, apabila prasarana sukan semakin baik, pihak university juga berharap agar kecemerlangan warga UMS dalam sukan akan turut meningkat seiring dengan kemudahan yang disediakan.

Pada kesempatan ini juga, saya ingin mengucapkan syabas dan tahniah kepada kakitangan UMS yang telah berjaya terpilih mewakili pasukan negeri, mahupun pasukan kebangsaan dalam acara sukan boling pada sukan MAKSAK dan bola sepak wanita Sukan Sea Kuala Lumpur 2017 nanti. Sesungguhnya, UMS sangat berbangga dengan pencapaian ini dan harapan saya dengan adanya Kejohanan Sukan Staf,

lebih ramai lagi bakat baharu yang kita dapat kenal pasti dan ketengahkan ke peringat yang lebih tinggi. Syabas sekali lagi!

Akhir kata, tahniah sekali lagi kepada Pendaftar UMS, Pusat Sukan, Jawatankuasa Pengelola dan semua kontinjen dan atlet terlibat yang menjayakan penganjuran kejohanan kali ini. Saya berdoa semoga warga UMS sentiasa sihat dan cergas menjalani kehidupan seharian. Selamat bertanding kepada semua.

Saya, dengan lafaz bismillahirrahmanirrahim,
merasmikan KEJOHANAN SUKAN STAF UMS KALI
KE-16 bagi tahun 2017.

Sekian, terima kasih.